



Broj: UP09-07-1-673/19
Sarajevo, 23.09.2019. godine

Ministarstvo pravde Bosne i Hercegovine, rješavajući Zahtjev „Asocijacije kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a, zastupane po Zajedničkoj advokatskoj kancelariji Jasmir Muratović, Tanja Hadžagić, Ilvana Bijedić, za upis promjena u Registru udruženja, na osnovu člana 34. stav 1. Zakona o udruženjima i fondacijama Bosne i Hercegovine („Službeni glasnik BiH“, br: 32/01, 42/03, 63/08, 76/11 i 94/16)(u daljem tekstu: Zakon) i člana 4. stav (1) Pravilnika o načinu vođenja registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija («Službeni glasnik BiH», broj 44/10 i 14/12) (u daljem tekstu: Pravilnik), donosi

RJEŠENJE

Odbacuje se Zahtjev „Asocijacije kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a, od 27.03.2019. godine, za upis promjena u Registru udruženja kod Ministarstva pravde Bosne i Hercegovine.

Obrazloženje

„Asocijacija kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a (u daljem tekstu: Asocijacija), upisana je u Registar udruženja kod Ministarstva pravde Bosne i Hercegovine, pod registarskim brojem: RU-28/02, Knjiga I Registra, dana 12.09.2002. godine.

Asocijacija je 27.03.2019. godine podnijela Zahtjev za upis promjena u Registru udruženja ovog Ministarstva, putem ovlaštene osobe.

Imajući u vidu da je Asocijacija, zastupana po navedenim punomoćnicima, povodom Rješenja ovog Ministarstva, Broj: UP09-07-1-1003/18 od 12.07.2018. godine, pokrenula upravni spor tužbom pred Sudom Bosne i Hercegovine, te da je upravni spor bio u toku, postupak upisa izmjena i dopuna u Registru udruženja, pokrenut po Zahtjevu AMUS-a, u predmetu Broj: UP09-07-1-673/19 od 27.03.2019. godine, bio je prekinut do pravomoćnog okončanja prednjeg postupka koji se vodio na Sudu BiH, broj predmeta: S1 3 U 029714 18 Fp od 19.09.2018.godine.

Prednji postupak upisa izmjena i dopuna u Registru udruženja prekinut je Zaključkom Ministarstva, broj prednji, dana 15.04.2019. godine, a na temelju odredbe člana 135. stav (1) Zakona o upravnom postupku („Službeni glasnik BiH“, br. 29/02, 12/04, 88/07, 93/09, 41/13 i 53/16).

Dana 13.06.2019. godine Ministarstvo pravde Bosne i Hercegovine zaprimilo je Presudu Suda Bosne i Hercegovine, Broj: S1 3 U 029714 18 U od 01.06.2019. godine, kojom se odbija tužba tužitelja „Asocijacija kompozitora-muzičkih stvaralaca“, zastupane po punomoćnicima Zajedničkoj advokatskoj kancelariji Jasmir Muratović, Tanja Hadžagić, Ilvana Bijedić, povodom Rješenja ovog Ministarstva, Broj: UP09-07-1-1003/18 od 12.07.2018. godine.

Imajući u vidu da je odredbom člana 139. stav (1) Zakona o upravnom postupku propisano da se postupak, prekinut zbog rješavanja prethodnog pitanja kod nadležnog organa, u ovom slučaju Suda BiH, nastavlja pošto rješenje doneseno o tom pitanju postane konačno, to je postupak po Zahtjevu Asocijacije za izmjene i dopune registracije u Registru udruženja, nastavljen na temelju odredbe člana 34. stav 1. Zakona o udruženjima i fondacijama Bosne i Hercegovine (u daljem tekstu: Zakona).

U nastavku postupka Ministarstvo je utvrdilo da zahtjev nije potpun, te da sadrži nedostatke i nepravilnosti zbog kojih nije moguće izvršiti upis promjena u Registru udruženja. Ministarstvo je aktom, Broj: UP09-07-1-673/19 od 17.07.2019. godine zatražilo ispravku i dopunu zahtjeva. Navedenim aktom, podnosilac zahtjeva je upućen u kom dijelu je potrebno izmijeniti i dopuniti zahtjev, te da će Ministarstvo rješenjem odbaciti Zahtjev za upis promjena u Registru udruženja, ukoliko podnosilac zahtjeva ne otkloni nedostatke u predviđenom roku.

Podnosilac zahtjeva je podneskom od 28.08.2019. godine dostavio slijedeće: Obrazac 2 (Zahtjev za izmjene i dopune registracije udruženja); Spisak redovnih članova Udruženja; Zapisnik sa elektronske sjednice Skupštine Asocijacije, Broj: SZ-02/19 od 20.03.2019. godine; Zapisnik Komisije o prebrojavanju glasova, Broj: KZ-02/19 od 19.03.2019. godine, te odštampana izjašnjenja članova Skupštine na elektronskoj sjednici Skupštine.

Uvidom u dostavljene dokaze utvrđeno je da podnosilac zahtjeva nije u cjelosti postupio prema Obavještenju Ministarstva, iz slijedećih razloga:

Spisak redovnih članova Udruženja ne sadrži sve podatke propisane članom 15. stav 2.a), b), c) i d) Zakona, kako je to naloženo u tački 2. Obavještenja Ministarstva, Broj: UP09-07-1-673/19 od 17.07.2019. godine.

Nije dostavljen Spisak sa vlastoručnim potpisima svih redovnih članova Skupštine Udruženja, koji su *prisustvovali* sjednici ovog organa 19.03.2019. godine, na kojoj su usvojene odluke koje su predmetom Zahtjeva za upis promjene činjenica upisanih u Registru udruženja ovog Ministarstva.

Zapisnik sa elektronske sjednice Skupštine Asocijacije, Broj: SZ-02/19 od 20.03.2019. godine; Zapisnik Komisije o prebrojavanju glasova, Broj: KZ-02/19 od 19.03.2019. godine, te odštampana izjašnjenja članova Skupštine na elektronskoj sjednici Skupštine, nisu punovažna i ne mogu proizvesti pravno dejstvo, budući da mogućnost održavanja sjednice Skupštine elektronskim putem nije propisana važećim Statutom Asocijacije, Broj: 01/16 od 15.02.2016. godine.

Imajući u vidu da je statut najviši pravni akt svakog udruženja registrovanog na nivou Bosne i Hercegovine, jedino su odredbe tog pravnog akta mjerodavne za utvrđivanje postojanja uslova za održavanje i punovažno odlučivanje skupštine udruženja, ali i ostalih organa udruženja propisanih statutom.

Stoga je uvidom u važeći Statut Asocijacije, Broj: 01/16 od 15.02.2016. godine, utvrđeno da je odredbom člana 21. stav 6. i dalje, jasno propisan način sazivanja sjednica Skupštine Asocijacije, kvorum i pravila glasanja, te se iste odredbe ne mogu mijenjati ili derogirati pravnim aktima niže pravne snage, kao što su pravilnici, poslovnici i tome slično.

Prema tome, Poslovnik o radu Skupštine Asocijacije, kao akt niže pravne snage, je u suštini provedbeni propis u funkciji jasnije primjene i provedbe odredaba Statuta, te se kao takav mora temeljiti isključivo na odredbama Statuta, a nikako biti u suprotnosti sa istim niti njegova dopuna.

Također, u okolnostima kada odluku o sazivanju Skupštine Asocijacije donosi Upravni odbor Asocijacije, sukladno članu 25. stav 11. i dalje, jasno je propisan način sazivanja sjednica Upravnog odbora Asocijacije, kvorum i pravila glasanja. Upravni odbor Asocijacije je kolektivno tijelo, te punovažnu odluku o sazivanju sjednice Skupštine Asocijacije mora donijeti Upravni odbor Asocijacije, a ni u kojem slučaju predsjednik Upravnog odbora Asocijacije samostalno.

Asocijacija u toku postupka nije dostavila dokaz da je Upravni odbor Asocijacije održao sjednicu ovog organa sukladno prednjim odredbama Statuta Asocijacije, da postoje uslovi za punovažno odlučivanje, niti da je punovažnu odluku o sazivanju sjednice Skupštine Asocijacije donio Upravni odbor Asocijacije.

Slijedom prednjih odredbi Statuta, *Poziv članovima skupštine Asocijacije na izjašnjenje od 08.03.2019. godine*, vlastoručno potpisan od predsjednika Upravnog odbora Asocijacije Sučić Davora, ne može se smatrati punovažnim i proizvoditi pravno dejstvo.

Skupština Asocijacije nije pristupila donošenju novog Statuta Udruženja, kako je to naloženo u tački 5. Obavještenja Ministarstva, broj i datum prednji, a imajući u vidu opseg priložene Odluke o izmjenama i dopunama Statuta Udruženja, Broj: SO-06/19 od 19.03.2019. godine, te da se istom mijenja, odnosno dopunjuje više od polovine odredaba važećeg Statuta Udruženja, Broj: 01/16 od 15.02.2016. godine.

Iz prednjeg proizilazi da podnosilac Zahtjeva nije u cjelosti postupio po Obavještenju Ministarstva, Broj:UP09-07-1-673/19 od 17.07.2019. godine, te da su ispunjeni uslovi iz člana 34. stav 1. Zakona o udruženjima i fondacijama Bosne i Hercegovine, na osnovu čega je odlučeno kao u dispozitivu Rješenja.

Na ovo Rješenje naplaćena je administrativna taksa u iznosu od 50,00 KM u skladu sa TAR.Brojem 108. Odluke o dopuni tarife administrativnih taksi, („Službeni glasnik BiH“ broj: 73/17).

Pouka o pravnom lijeku:

Protiv ovog rješenja nije dopuštena žalba, ali se može pokrenuti upravni spor tužbom pred Sudom Bosne i Hercegovine. Rok za podnošenje tužbe je 60 dana od dana prijema ovog rješenja.

Dostavljeno:

- ZAJEDNIČKA ADVOKATSKA KANCELARIJA JASMIR MURATOVIĆ, TANJA HADŽAGIĆ, ILVANA BIJEDIĆ za „Asocijaciju kompozitora-muzičkih stvaralaca“
Ulica Branilaca Sarajeva broj 49, 71 000 SARAJEVO;
- Zbirka isprava.

